

ՀԱՄԱՆԻՇՆԵՐԻ ՇԱՐՔԸ ԺԱՄԱՆԱԿԱԿԻՑ ՀԱՅԵՐԵՆՈՒՄ

Ա. Մ. ՍՈՒՔԻԱՍՅԱՆ

Հոմանիշների շարքը լեզվում բառերի և դարձվածների այն խումբն է, որի մեջ մտնող հիշյալ լեզվական միավորները իրար հետ կապված են հոմանշային կապերով կամ հարաբերություններով: Բայց քանի որ հոմանիշներ կարող են լինել ինչպես բառեր, այնպես էլ դարձվածաբանական միավորներ, հետևաբար հոմանշային շարք կախող են կազմել երկու և ավելի բառեր կամ դարձվածաբանական միավորներ, որոնք միմյանց հետ կապված են հոմանշային կապերով: Հոմանիշների շարքի հիմքում ընկած է միևնույն հասկացությունը նշանակող երկու կամ ավելի բառերի կամ դարձվածների իմաստների մոտությունը կամ նույնությունը, ինչպես նաև նրանց լրացուցիչ հուղա-արտահայտչական դունավորման և ոճական տարբեր կիրառությունների առանձնահատկությունները: Այսպիսով, բառերի կամ դարձվածների այն խումբը, որ միավորում է երկու կամ ավելի հոմանիշ բառեր կամ դարձվածներ, կոչվում է հոմանիշների շարք: Հոմանիշների շարք տերմինից բացի (որն ի դեպ ամենատարածվածն է), բառերի այդ խումբը անվանում են նաև հոմանիշների փունջ կամ հոմանիշների բույն:

Հոմանիշների շարքը իրենից ներկայացնում է պատմականորեն կազմավորված բառերի և դարձվածաբանական միավորների համաժամանակյա խումբավորում, որը համակարգային բնույթ ունի¹:

Մասնագետների ճնշող մեծամասնությունը (Օ. Ախմանովա, Ա. Եվգենևա, Յու. Ապրեսյան, Ա. Շապիրո, Վ. Ֆավորին, Ա. Ռոզենման, Վ. Գրեչկո և ուրիշներ) հոմանիշների շարքի հիմքը, այսինքն նրա գոյության նախապայմանը համարում են արևելյան, որ տվյալ շարքի մեջ մտնող բառերն ու դարձվածները արտահայտում են միևնույն հասկացությունը, բայց իրարից կարող են տարբերվել կամ իմաստային նրբերանգներով կամ ոճական կիրառությամբ և հուղա-արտահայտչական գունավորմամբ, կամ էլ և մեկով և մյուսով²:

Հոմանիշների շարքի գոյության կարևոր, ավելի ճիշտ՝ հիմնական շափանիշը, իմաստաբանականն է, այսինքն՝ լեզվի զարգացման տվյալ փուլում գործող բառերի և դարձվածների հոմանշային կապերը, որոնց շնորհիվ էլ փաստորեն գոյություն ունեն հոմանշային շարքերը: Հոմանշային շարքերի կայունությունը պայմանավորված է իր հերթին լեզվի զարգացման տվյալ ժամանակահատվածում բառերի և դարձվածաբանական միավորների հոմանշային կապերի ամրության աստիճանով: Իմաստաբանական շափանիշը, որպես հոմանշային շարքի հիմնական նախապայման, ի վերջո պայմանավորված է լեզվի զարգացման տվյալ էտապում հանրորեն գիտակցվող և հանրորեն ընդունված բառի տվյալ բառային իրական իմաստով, երբ տվյալ բառիմաստին վերաբերող մնա-

¹ См. Ю. Д. Апресян, Проблема синонима, ВЯ, 1957, № 6, էջ 84—88:

² См. А. П. Евгеньева, Проект словаря синонимов, М., 1964, էջ 16:

ցած բոլոր շնորհմաները մերժվում են իբրև անձնական, ոչ իրական արտահայտություններ կամ զբոսորդումներ։

Մյուս կողմից, լեզվի բառապաշարի ամբողջության մեջ նրա որևէ շրջանի հոմանիշները, այնուամենայնիվ իրենց մեջ պարունակում են լեզվի զարգացման տարրեր փուլերի շերտավորումները, որպես լեզվի բառային կազմի օրինական և անկապտելի բազադրամատ։ Բայց միակողմանի կլինի հոմանիշների շարքերի գոյությունը պայմանավորել միայն բառերի և զարձկանների հոմանշային կապերով։ Իրականում այդ կապերը գոյություն չունեն այլ կերպ, քան հոմանշային շարքերի միջոցով, նրանց շնորհիվ։ Հոմանիշների շարքը լեզվում այդ հարաբերությունների գոյության ապացույցն է։ Հետևաբար, լեզվում հոմանշությունը և հոմանշային շարքը փոխադարձաբար պայմանավորված են իրարով։ Հոմանիշների շարքի հիմնական լավանիշը, այնուամենայնիվ, ինչպես նշվեց, իմաստաբանականն է, որի հետ որոշ մասնաղետներ սերտորեն կապում են նաև այլ լավանիշներ՝ հոմանիշների փոխադարձ փոխարինելիությունը և կառուցվածքային պայմանավորվածությունը։

Հոմանիշների շարքի մեջ մտնող բառերի և զարձկանների փոխադարձ փոխարինելիությունը կարող է որոշ պայմաններում նպաստել հոմանիշների շարքի կազմության և հոմանիշների սահմանների էջերուման հարցերին։ Այդ լավանիշը որոշիչ դեր կարող է խաղալ միայն բացարձակ հոմանիշների կամ նույնանիշների շարքերի կազմության և նրանց շարքերի սահմանները որոշելու համար։ Բայց այն բացարձակ և միակ լավանիշ չի կարող լինել ներիմաստային հոմանիշների համար, այսինքն՝ այն հոմանիշների համար, որոնք բնդհանուր իմաստի առկայության պայմաններում իրարից որոշակիորեն տարբերվում են նաև զանազան իմաստային նրբերանգներով, հետևաբար և, ոչ բոլոր դեպքերում է հետաաւոր զրանց միմյանցով փոխարինելու։ Մյուս կողմից, բառիմաստին սերտորեն առնչվում է նաև բառի բազմիմաստությունը, որը լրացուցիչ ղժվարություններ է ստեղծում հոմանիշների փոխադարձ փոխարինելիության հարցում։ Բազմիմաստ բառը իր ոչ բոլոր իմաստներով է ի վիճակի հոմանշային կապերի մեջ մտնելու մենիմաստ կամ բազմիմաստ բառերի հետ։ Այդ կարգի հոմանիշների իմաստային որոշ տարբերություններին հարում են նաև նրանց ոճական կիրառությունների և հուզա-արտահայտչական զունավորումների տարբերությունները։ Այլևս չենք խոսում այն մասին, որ լեզվի համակարգում այդ կարգի հոմանիշների տեսակաբար կշիոր լավազանց մեծ լինելու պատճառով փոխադարձ փոխարինելիության լավանիշը չի կարող շոշափելի դեր խաղալ հոմանիշների շարքի կազմության և նրա սահմանների որոշման գործում։

Կառուցվածքային պայմանավորվածությունը իր տիպերով և բնույթով միատեսակ չի լինում, Այն կարող է մի դեպքում բխել բառի որոշակի քերականական կարգին պատկանելուց, որով և պայմանավորվում է նրա կապակցական ձևերը ուրիշ բառերի հետ։ Այն կարող է արտահայտվել նաև բայերի խրեդրառության առանձնահատկություններով։ Միաժամանակ կարող է որոշվել ձևաբանական և շարահյուսական առանձնահատկությունների կապակցությամբ։

Հոմանիշների փոխհարաբերության մեջ իրենց արտացոլումն են գտնում ոչ միայն այս կամ այն բառաքերականական, բառակազմական օրինաչափությունները, այլև, վերջին հաշվով, լեզվի իմաստաբանական համակարգերի ավելի բնդհանուր պրոցեսները։ Այդ առումով հոմանիշների խնդիրը ուղղա-

կիորեն կախվածության մեջ է գտնվում բառապաշարի համակարգայնության խնդրի հետ:

Այսպիսով, շարքը լեզվի բառապաշարի ավելի ընդհանուր համակարգային հարաբերությունների կոնկրետ արտահայտությունն է, Հոմանիշների համակարգայնության հիմնական ապացույցը, բայտ Բ. Վ. Գորենովի³, նրանց հոմանշային փակ շարք կազմելն է, որը լեզվի տվյալ համաժամանակյա վիճակի համար տեսականորեն չի կարող ո՛չ ընդլայնվել, ո՛չ էլ կրճատվել, բաց լեզվի զարգացման հետ անխուսափելիորեն փոփոխվում է, ինչպես նոր բառերի երևան գալու և հին բառերի դուրս մնալու պատճառով, այնպես էլ լեզվի կազմում իմաստաբանական հարաբերությունների հետևանքով պահպանվող բառերի շնորհիվ: Բնական է, որ լեզվի զարգացման տվյալ էտապում հոմանիշների շարքը հարաբերականորեն կայուն է և սերտորեն կապված է բառապաշարի տեղաշարժների հետ:

Լեզվի բառակազմական և իմաստաբանական փոփոխությունների կոնկրետ դրսևորումները հոմանիշների հարաբերության, հոմանշային կապերի և գործնականում նաև հոմանիշների շարքերի մեջ հիմնականում կատարվում են նախ և առաջ՝ տվյալ փուլում լեզվի բառային կազմում կատարվող փոփոխությունների շնորհիվ: Լեզվի բառապաշարի քանակական փոփոխություններն արտահայտվում են նորարանությունների երևան գալու և որոշ բառեր լեզվական շրջանառությունից դուրս մնալու միջոցով:

Լեզվում բառակազմական պրոցեսներին զուգընթաց կամ էլ զրանց հետ սերտորեն կապված՝ գործում են նաև իմաստաբանական պրոցեսները, որոնք նույնպես մեծ չափով ներգործում են հոմանշային կապերի, հոմանիշների շարքերի առաջացման կամ քայքայման վրա: Այդ ազդեցություններն արտահայտվում են բառիմաստի զարգացման բոլոր տեսակների՝ բառիմաստի ընդլայնման, բառիմաստի նեղացման, համարանության, մեկ ուղղությամբ իմաստների զարգացման և այլ նդանակներով, ինչպես նաև բառի մեջ նոր իմաստների առաջացման և եղած իմաստների վերացման կամ մթագնման ձևերով: Մյուս կողմից, հոմանշային շարքերի փոփոխմանը նպաստում է նաև հին բառերի և իմաստների լեզվական գործածությունից դուրս մնալու հանգամանքը:

Քանակական տեսակետից հայերենում հոմանիշների շարքի նվազագույն սահմանը երկու հոմանիշներն են, Հոմանիշների շարքը կարող է լինել երկանդամ և բազմանդամ:

ա) Նրկանդամ հոմանիշների շարք. Գրանք հայերենում համեմատաբար ավելի սակավ են. օր. ալոգիզմ-հակատրամաբանականություն, ամպերոմետր-ամպերաչափ, աղցան-սալաթ, ալրաբեդիո-ալրամիջատ և այլն: Ինչպես բերված օրինակներից էլ երևում է, բառային հոմանիշներով կազմվող երկանդամ շարքերը կազմվում են հիմնականում նույնանիշներից: Բառերի ծագման տեսակետից զրանց ճնշող մեծամասնությունը կազմվում է, բայտ երևույթին, նորագույն փոխառյալ բառի և նրա հայերեն նորակազմ համանշանակի միջոցով, որ լեզվում ղեկեռ լայն տարածում չի գտել: Սովորաբար այդ կարգի շարքերի հոմանիշների միջև պայքար է գնում միևնույն զրանցից մեկի հաղթանակը: Հետևաբար, հոմանիշների այդ շարքերը լեզվի զարգացման տվյալ փուլում

³ Б. А. Горнунг, О природе синонимии в языке и теоретических предпосылках составления синонимических словарей, ВЯ, 1965, № 89—99.

ժամանակավոր բնույթ են կրում: Հոմանիշների երկանդամ շարքերից կայունը, անշուշտ, հայ գրական լեզվի և գավառական բառերով կազմված փնջերն են: Հայերենում ավելի տարածված պետք է համարել նաև դարձվածաբանական միավորներով կազմվող հոմանիշների երկանդամ շարքերը:

բ) Հոմանիշների բազմանդամ շարքեր: Արդի հայերենում ավելի ճոխ են հոմանիշների բազմանդամ շարքերը, որ վկայում է հայոց լեզվի իմաստաբանական համակարգում հոմանշային կապերի հարաբերության և բազմազանության մասին: Դրանք հայերենում կազմվում են երեք և ավելի հոմանիշ բառերից ու դարձվածաբանական միավորներից: Բացառիկ դեպքերում միայն՝ շարքում հոմանիշ բառերի և դարձվածաբանական միավորների թիվը հասնում է մի քանի տասնյակի: Համեմատյալ հեշտ, արդի հայերենում հոմանիշների շարքի միջինը տատանվում է 8—10 հոմանիշների միջև: Բերենք բաղմանդամ հոմանիշների շարքերից մի օրինակ. մեռնել,— վախճանվել, անշնչանալ, անէանալ, դիանալ, փխր. նեղել, հանգ(չ)ել, հանգստանալ, անցնել (աշխարհից), շունչը փչել, հոգին տալ, մահկանացուն կնքել, աստղը խավարել, արևը խավարել, արևը մարել, գերեզման իջնել, շիրիմ գրկել, գետնի տակն անցնել, սև հողը մտնել, սև հողի բաժին դառնալ, ծուխը մարել և այլն, և այլն:

Սովորաբար, բաղմանդամ հոմանիշների շարքեր են կազմում իմաստով և ոճական կիրառություններով նրբերանգային տարբերություններ ունեցող հոմանիշները:

Որակական տեսակետից հոմանիշների շարքերի առանձնահատկությունն այն է, որ նրանք կազմվում են ինչպես բառերով, այնպես էլ դարձվածներով առանձին-առանձին և խառն՝ հոմանիշ բառերով և դարձվածներով միասին:

Որպես օրենք, հայերենում հոմանիշների շարքի մեջ միավորվում են միայն նույն խոսքի մասին պատկանող բառային միավորները: Այս կանոնը երբեմն կարող են խախտել փոխանունաբար հանդես եկող հայերենի որոշ խոսքի մասերը. օր. զրո թվականը գոյականաբար գործածվելիս՝ հոմանշային կապերի մեջ է մտնում ռչնշոթյուն գոյականի հետ և այլն:

Ըստ կառուցվածքի, այսինքն՝ հոմանշային հարաբերությունների բազմազանություն, ամենապարզն ու հասարակը միայն նույնանիշ բառերով կազմված շարքն է. կամ էլ՝ հոմանշային բարդ շարքի մեջ նույնանիշների խումբն է, որ դուրկ է իմաստային և ոճական տարբերությունների վրա հիմնված բարդ կապերից: Հոմանիշների բաղմանդամ շարքի մեջ նույնանիշ բառերը խմբվելով միասին, փաստորեն, առանձին անցման օղակ են ծառայում հոմանիշների ամբողջական շղթայի մեջ:

Հոմանիշների պարզ շարքեր հայերենում կազմվում են հիմնականում լեզվի միայն գրական բառերի, գրական լեզվի արևելահայ և արևմտահայ ճյուղավորումներին պատկանող բառերի, գրական բառերի և փոխառությունների, գրական և գավառական բառերի և միայն գավառական բառերի նույնանիշներից, այսպես՝

ա) Գրական բառերից կազմվող նույնանիշների շարքեր. օր. ականակիր-ականանալ, ականահարել-ականակոծել, ամբողակ-պնդողակ, մանեկ, անաղ-կլայեկ, այցատոմս-այցաբարս և այլն:

բ) Գրական լեզվի արևելահայ և արևմտահայ ճյուղավորումների բառերից կազմվող նույնանիշների շարքեր. օր. սպիտակ-ճերմակ, գեղեցիկ-աղվոր,

վատ-ղեշ, ազդ-ցեղ, պաղպաղակ-սառնանուշ, սառը-պաղ, հեռուստացույց-հեռատեսիլ, տիեզերաղնաց-աստղանավորղ և այլն:

զ) Գրական և փոխառյալ բառերի նույնանիշներից կազմվող շարքեր. օր. ալարաստր-լսնակուճ, ջրակուճ. ականառումբ-ֆուդաս. բաժնետոմս, բաժ-նեթուղթ-ակցիա. ակուստիկա-ձայնարանություն. ամոնյակ-ավշակախեժ, անուշադր, անուշադրակ. իդեոլոգիա-դադափարաբանություն, զադափարախոսություն և այլն:

դ) Գրական և զավառական նույնանիշներից կազմվող շարքեր. օր. Արուս-յակ-Աստղիկ, Այգաստղ, Լուսարբր, Լուսաստղ, Գիշերավար, Նոյեբու, Լուսատու աստղ, Սրեկոյան աստղ, Առավոտյան աստղ, (բրբ.) Քարվանկորուստ, Քար-վանկոտրուկ, Քարվանի աստղ (Վեներա) և այլն:

ե) Գավառական բառերի նույնանիշներից կազմվող շարքեր. օր. ակիշ-ակիշթաթ, թաթ, թաթակիշ, տաշտաբեր, տաշտաբերիշ (խմորի տաշտը բերե-լու երկաթե փոքր գործիք), կամ՝ ամոլ (ամբուլ), եզնամոլ (եզնամուլիկ), լուծբ. հարկիք (լուծր միասին քաշող). ավելատուն-հորքատակ, հորիքսետև, մկրե-տուն, փոշետուն (գուլթանի վեցերորդ լուծր) և այլն:

Նույնանիշների բերված շարքերից երևում է, որ՝ ա) Քանակական տեսա-կետից շարքը ընդհանուր առմամբ բաղմանդամ չէ, երբ այն վերաբերում է զրական լեզվի բառերին: Այդ դեպքում այն երկու կամ երեք հոմանիշներից է կազմվում, Համեմատաբար շարքը բաղմանդամ է դառնում, երբ կազմվում է միայն զավառական բառերից: Այդ բնական է, որովհետև շարքում կենտրոնա-նում են, փաստորեն, հայերեն բաղմամբիվ բարբառների զավառական բառերը: բ) Բառերի խոսքի մասային պատկանելիության տեսակետից նույնանիշների շարքերի առանձնահատկությունն այն է, որ զրանք կազմվում են գերազանցա-պես զոյականերով, ավելի սակավ՝ ածականերով և խոսքի մնացած մասե-րով: Համարյա բացակայում են բայերով կազմվող շարքերը: Այդ վերջին հան-դամանքը բխում է նույնանիշների կազմության բառա-քերականական առանձ-նահատկություններից:

զ) Բառերի գործածության տարբեր ոլորտներին պատկանելու տեսակե-տից նույնանիշային հարաբերությամբ կազմված շարքերը առավելապես կազմվում են տերմինաբանական բառերից, առտեին զանազան հարաբերու-թյունների հետ կապված կենցաղային, գյուղատնտեսական զանազան գործիք-ների անուններից և, միայն արևելահայ և արևմտահայ լեզուների նույնանիշ-ների դեպքում՝ լեզվի սովորական բառերից: Նույնանիշների վերոհիշյալ առանձնահատկությունների շնորհիվ հիմնականում բացառվում է հոմանիշների շարքում հիմնաբառի կամ գերապատվելի բառի (դոմինանտ) հարցը:

Վերոհիշյալ առանձնահատկությունների տեսակետից բոլորովին այլ պատ-կեր է ներկայացնում համանիշների շարքը: Այդ վերջինս ընդհանրապես հա-րուստ է իր անդամների իմաստային, բառա-քերականական, հուզա-արտա-հայտչական և կիրառական զանազան կապերով ու առանձնահատկությունե-րով, ինչպես նաև շարքի քանակային կազմությունը, օր. Հին-հնամենի, հեօր-յա, հնագույն, հինավուրց, վաղեմի, վաղնչական, նոյի տարվա. կամ՝ սպի-տակ-սպիտակագույն, սպիտակաթույր (սպիտակին տվող)՝ սպիտակավուն, սպիտակբրանգ, սպիտակորակ, ճերմակ (արևմտհ.), ճերմակագույն, ճերմակա-թույր, ճերմակերանգ, ճերմակորակ, ճերմակավուն, կաթնագույն, կաթնադ-թույր, կաթնբրանգ, կաթնավուն, կաթնորակ, (խակց.) ճիպ-ճերմակ, սիպ-սիպ:

տակ (ամբողջապես), սպիտակահեղց (զրբ.) կամ՝ ձի-հովատակ, որձաձի, փահլ (հնց.), զամբիկ, ճակ, ճայիկ, սարակ, մատակածի, նժույզ, արշավածի, ռահվար (հնց.), հեծելակ (հեծնելու), զրաստ (բեռնակիր), երիվար, ասուլ (հնց.) տեսակները՝ (հնց.) անղրուար (խոշոր), բոշո (մանր), վարզածի (կառ-րին լծվող), սևավ (զրբ.), ճերմակ (սպիտակ ձի), աշխետ (շիկագույն ձի), ճանճկեն (սև և սպիտակ), ճարտուկ (սպիտակ՝ սևախայտ), կոստնտոտիկ (սպիտակախայտ ոտքերով), արաբիկ (արագրնթաց), պաշո (բրբ.) (սպիտակ), մատակախազ, մատակախանձ (շմալած), քաժավարոտ, թազամսավոր (մա-լած). կամ՝ վախենալ-երկյուղել, սոսկալ, զարհուրել, սահմակել, քստմնել, երկյուղածել (մարդուց ի նշան հարգանքի), ահաբեկվել (մարդու կողմից), փխբ.՝ դողալ, սարսռալ, փշաքաղվել, ցնցվել, երկնչել (զրբ.), սիրտ շանել, զարդանդել, լեղին ճաքել, ահր սիրտն ընկնել, սիրտը փորն ընկնել, թուքը ցա-մաքել, լեղին շորանալ, լեղուն ցամաքել, ջանք դող ընկնել, ձայնը փորն ընկ-նել և այլն: Նույնանիշների համեմատությամբ հոմանիշների շարքերը քանակական և կառուցվածքային-որակական տեսակետից հետևյալ առանձնա-հատկություններն ունեն:

ա) Քանակական տեսակետից հոմանիշների շարքերը ավելի հարուստ են, քան նույնանիշներին: Այստեղ երկանդամ և ընդհանրապես սակավանդամ շարքերը բացառություն են կազմում: Հոմանիշների իմաստա-ոճային բազմա-դան հարաբերությունների հետևանքով շարքն անհամեմատ ճոխանում և բազ-մանդամ է դառնում:

բ) Հոմանիշների շարքը կազմության տեսակետից նույնպես տարբերվում է նախորդից. եթե այն դերագանցապես կազմվում էր միայն բառերից, այստեղ արդեն երևան է դալիս նաև լեզվի դարձվածաբանական հարստությունը: Լստ որում, հոմանիշների շարքեր կազմվում են նաև միայն դարձվածներից: Ի միայն դարձվածներով կազմվող հոմանիշների շարքը ընդգրկում է իրենց կառուց-վածքով նախադասությանը համարժեք դանդաղ տիպի դարձվածաբանական միավորներ, որոնք լեզվում հանդես են գալիս առածների, ասացվածների, թեմայի խոսքերի ձևով. օր. նման ղնմանն դտանի (ճանաչի) և խուփը ղլորավ դտավ պուտուկը (կամ կճուճը). կամ՝ մի ծաղկով դարուն չի դա, մի ձեռքը ծափ չի տա և այլն:

գ) Հոմանիշների տվյալ շարքերի միջոցով խոսքի բոլոր մասերը լայն հնարավորություն են ստանում դրսևորելու իրենց բազմադան և բազմապիսի կապերը, այսինքն՝ այս դեպքում ավելի հստակորեն է արտահայտվում խոսքի բոլոր մասերի հարաբերակցությունը արդի հայերենում: Լստ որում, այս դեպ-քում համեմատաբար շատ են դոյականներով, բայերով, ածականներով կազմվող շարքերը: Այս վերջին հանգամանքը պայմանավորված է հայոց-լեզվի բառապաշարում խոսքի մասերի քանակական հարաբերության և բառային կազմում դրանց տեսակարար կշռի հետ:

դ) Իմաստաբանական կապերի տեսակետից խիստ բազմադան են շարքի մեջ մտնող հոմանիշների հարաբերությունները: Հոմանիշների այդ իմաստա-յին կապերի բազմազանությամբ էլ վերջին հաշվով պայմանավորված է նրանց՝ որպես լեզվական համակարգի ճոխությունն ու հարստությունը:

Շարքի մեջ մտնող հոմանիշների իմաստային կապերը իրենց արտա-հայտությունն են դանում այլևայլ ձևերի և եղանակների մեջ:

Դրանցից առաջին հերթին անհրաժեշտ է նշել ըստի մենիմաստությունը և բազմիմաստությունը: Մենիմաստ բառերի հոմանշային կապերի բնույթը համեմատաբար պարզ է: Այդ կարգի բառերը հոմանշային հարաբերության մեջ են մտնում նույնատիպ բառերի կամ բազմիմաստ բառերի որևէ մեկ իմաստի հետ: Այդ տեսակետից առանձնակի հետաքրքրություն են ներկայացնում բազմիմաստ բառերը: Դրանք, սովորաբար, հոմանշային կապերի մեջ են մտնում կամ իրենց բոլոր իմաստներով, կամ իմաստներից մի քանիսով, կամ էլ, պարզապես, մեկ իմաստով: Ըստ որում, բազմիմաստ բառերը իրենց տարբեր իմաստներով հոմանշային կապերի մեջ մտնելով ալլեալլ բառերի և զարծվածաբանական միավորների հետ, վերջիններիս հետ էլ կազմում են առանձին հոմանշային շարքեր: Այնպես որ, միևնույն բազմիմաստ բառ իր իմաստների համապատասխան կարող է հանդես գալ բոլորովին տարբեր հոմաներչների շարքերում:

Համաներչների շարքի իմաստաբանական առանձնահատկություններից ամենահիմնականը, սակայն, դրանց մեջ իմաստային որոշ տարբերությունների այսպես կոչված ներիմաստների կամ իմաստային նրբերանգների առկայությունն է, որով և պայմանավորվում է հոմանշային իմաստների ամբողջ հարստությունը: Վերոհիշյալ իմաստային տարբերությունները կարող են հանդես գալ բազմազան ձևերով և չափերով և դրանց կոնկրետ սահմանները որոշելը խիստ դժվար է: Իմաստային այդ տարբերությունների հիմնական առանձնահատկությունն այն է, որ դրանք վերաբերում են մեկ հասկացությանը: Իմաստային տարբերությունները պետք է վերաբերվեն միևնույն հասկացությանը, այնպես առաձգական կդառնան բառերի միջև հոմանշային կապերը և հոմաներչների դոները լայնորեն կբացվեն միևնույն հասկացությանը չպատկանող բառերի առջև: Համաներչների շարքի մեջ բառերի իմաստային տարբերությունները կարող են արտահայտվել բազմազան ձևերով:

ա) Իմաստի նրբերանգային տարբերություններ, որոնք ցույց են տալիս զործողության տարբեր աստիճանները, տարբեր ձևերն ու եղանակները, ինտենսիվությունը և այլն. օր. խնդրել-հայցել, աղաչել, աղերսել, թախանձել, պաղատել և այլն. կամ՝ լալ-արտասվել, հեկեկալ, հեծկլտալ (ցածրաձայն), ողբալ, կոծել, կականել (բարձրաձայն), կամ՝ ձիծաղել-խնդալ, ժպտալ (թեթևակի), հոհոալ, կշկշալ, քրքջալ (բարձրաձայն), ճխալ (ուրախությունից), փռվալ, փռվացնել (հանկարծակի), ատամները ցույց տալ (անշնորհք) և այլն:

բ) Որակի տարբեր աստիճանները ցույց տվող հոմաներչներ. օր. լավ, հիանալի, սքանչելի, գմալելի, սխրալի, զարմանալի և հրաշալի, հոյակապ, ընաշխարհիկ, անզուգական և այլն:

գ) Վերացական և թանձրացական (կոնկրետ), բնդհանուր և կոնկրետ հարաբերություններ ցույց տվող համաներչներ. օր. ապրել և գոյություն ունենալ, կամ՝ նայել-հայել, գիտել, տեսնել, աչքը չոկել և այլն:

դ) Համաներչներ՝ իմաստի ավելի լայն և ոչ լայն ծավալով. օր. հազուստշոր, զգեստ և համազգեստ (հատուկ, ըստ զբաղմունքի և ծառայության). կամ՝ բարձունք, բարձրություն և կատար, գագաթ և այլն:

ե) Համաներչներ, որոնք տարբերվում են որևէ հատկանիշի տարբեր աստիճաններով. 1. Մեծություն. օր. Մեծ-խոշոր, հսկա, վիթխարի, ահելի և այլն. 2. Գույնով, օր. կարմիր-ալ-կարմիր, կարմրավուն, կարմրածեղ, կարմրեղանգ

(կարմրին տվող), շառագույն, բոցագույն, ատրագույն, հրագույն և այլն.
Ճ. Զերմաստիճանով. օր. գոլ-տաք, ջերմ և այլն:

գ) Միևնույն առարկայի, երևույթի տարբեր տեսակները, սեռերը, ձևերը, արտահայտությունները ցույց տվող համանիշներ: Օր. քամի-հողմ (ուժեղ), հով, զով, զեփյուռ, սյուք (արևմտհ.) (մեղմ), հյուսիս, բուք (ցրտաշունչ, ձյունախառն), սամում (ուժեղ, անապատային), վիշապ, թաթառ (ուժեղ), հարավ, խորշակ (տաք) և այլն. կամ՝ այծ-քաղ, քոշ, նոխաղ (արուն) և այլն:

է) Համանիշներ, որոնք չեն համընկնում իրենց արտահայտած հասկացության ծավալի լայնությամբ, օր. արտիստ և դերասան (ավելի նեղ, թատերական), նկարիչ (ընդհանուր)-գեղանկարիչ (ընդհանուր, մեծ մասամբ որոշ թեմատիկայով նկարող), ծովանկարիչ (միայն ծովային տեսարաններ նկարող), բնանկարիչ, դաշտանկարիչ (բնության տեսարաններ նկարող) և այլն:

ը) Միևնույն առարկան, երևույթը տարբեր հատկանիշներով արտահայտող համանիշներ, օր. Աստված-Արարիչ, Տեր, Ստեղծող, Հաստիչ, Հայր, Ամենակալ, Արքա երկնից, Երկնային թագավոր, Երկնային դատավոր, Բարձրյալ, Երկնավոր, Երկնակալ, է, Ամենաստեղծ և այլն:

Մենք այստեղ բերեցինք միայն իմաստային ամենարնգհանուր կապերն արտահայտող համանիշների շարքերը: Իրականում այդ կապերը շատ են ու բազմազան և, փաստորեն, դրանք յուրաքանչյուր հոմանշային շարքում իրենց կոնկրետ դրսևորումն են ստանում: Իմաստային այդ բազմազան կապերով էլ պայմանավորված է հալոց լեզվի հոմանշային հարստությունը:

Հոմանիշների շարքերի մեջ իրենց արտահայտությունն են գտնում նաև բառերի և դարձվածաբանական միավորների ոճական, հուղա-արտահայտչական դունավորման, լեզվական տարբեր շերտերին և կիրառության տարբեր ոլորտներին պատկանելու, ինչպես նաև բառերի կապակցության զանազան առանձնահատկությունները:

ա) Լեզվում բառերի ըստ կիրառության տարբեր ոլորտների պատկանելիության, հոմանիշները (համանիշները և նույնանիշները) կազմում են համապատասխան շարքեր: Այսպես, գիտության և տեխնիկայի, ինչպես նաև հասարակական-քաղաքական տարբեր բնագավառներին վերաբերող տերմիններն ու բառերը ըստ առանձին մասնագիտության, կազմում են ինքնուրույն, առանձին շարքեր. օր. աթեիզմ-անաստվածություն, անաստվածապաշտություն, աստվածամբծություն (փիլիսոփայական), կամ՝ էթիոլոգիա-պատճառագիտություն (բժշկություն), էլեգիա-եղերգ, եղերերգ, սգերգ, ողբերգ (դրականություն), կամ՝ էլեկտրաուժաչափ-էլեկտրագինամոմետր (տեխնիկական), կամ՝ բոնցքամարտիկ-կոփամարտիկ (մարզական) և այլն:

բ) Հոմանիշների շարքում լայն չափերով արձանագրվում են բառերի և դարձվածների լեզվի տարբեր ոճերին և շերտերին պատկանելու փաստերը: Այսպես, հոմանիշների նույն շարքում ընդգրկվում են ինչպես գրական բառապաշարին՝ արևելահայերենին և արևմտահայերենին, այնպես էլ բարբառներին, հնացած, հազվագեղ գործածական և այլ շերտերին, ինչպես նաև դրական լեզվի տարբեր ոճերին՝ գրքային, բանաստեղծական, խոսակցական և այլն պատկանող բառերն ու դարձվածները. օր. Բամբասանք-հերյուրանք, զրպարտություն, շարախոսություն, բանասարկություն (դրական լեզվի բառերից), ասեկոսե (խոսակցական), ըսի-ըսավ (արևմտահայերեն), բամբասողություն, շարաբանություն, քսմսություն (հնացած), ճոշանք, կսկոոց (բարբառ-)

ռային), կամ՝ պանդուխտ-թափառական, գաղթական, վտարանդի (բռնի կերպով), օտարական (դրական), աստանդական, նժդեհ (գրքային), տարաշխարհիկ (հազվադեպ գործածվող), ղարիբ (բարբառային), կամ՝ գեղեցիկ-գեղեցկուհի (աղջիկ), գեղանի, գեղուհի (գրքային), սիրուն, սիրունիկ (խոսակցական), աղվոր, աղվորես (արևմտահայերեն), խորոտ, խորոտիկ, ոինտ, ոնտիկ, շարմաղ, շարմաղերես, թառլան, արմաղան (բարբառային) և այլն:

գ) Հոմանիշների շարքերի մյուս կարևոր առանձնահատկությունը հուզա-արտահայտչական գունավորումն է, որն իր արտահայտությունն է գտնում շարքեր կազմող անդամների, այդ թվում և բառերի ու դարձվածաբանական միավորների մեջ:

Հատկանշական է, որ միևնույն շարքի մեջ կարող են երևան գալ և գրական և բացասական գնահատությունները, բառերին տրվող միանգամայն տառեր, անգամ հակադիր գունավորումները, ինչպես՝ փաղաքշական, գոհակաբանական, հեգնական, ծաղրական, արհամարհական, նախատական և այլն: Այսպես օրինակ՝ նախատել-պարսավել, թուք ու մուր անել, կերածը բերնովը ետ բերել (գոհակաբանություն). կամ՝ նիհար-(հեգնական)՝ միսկարոտ, տանձիկոթ, ցամաք ձորի աղվես, ասեղ կուլ տված, (արհամարհական)՝ մի ծամելու միս շունեցող, քիթը բռնես՝ հոգին դուրս կգա և այլն. կամ՝ մեռնել-վախճանվել, հոգին ավանդել, մահկանացուն կնքել (գրքային), հրեշտակների հետ խոսել, աստծու մոտ գնալ և այլն (դրական վերաբերմունք՝ հանգուցյալի նկատմամբ) և սատկել, շան սատակ լինել, ոտները (նալերը) տնկել և այլն (արհամարհական, նախատական գունավորմամբ) և այլն:

Հուզա-արտահայտչական գունավորումից գուրկ են միայն տերմինաբանական արժեք ունեցող բառերը: Մնացած բոլոր դեպքերում հոմանիշները և անգամ նույնանիշների որոշ մասը օժտված են վերոհիշյալ գունավորմամբ: Հուզա-արտահայտչական գունավորումներով առանձնապես հարուստ են հայերենի դարձվածաբանական միավորները, որոնք էլ հիմնականում այլևայլ գունավորմամբ հարստացնում են հոմանիշների շարքերը:

Հոմանիշների շարքերի հարստությունը դրսևորվում է նաև նրա անդամների՝ առանձին հոմանիշ կամ նույնանիշ բառերի ֆունկցիայով, շարահյուսական տարբեր կիրառություններով, բառերի այսպես կոչված կապակցական ունակություններով: Օրինակ, հետևյալ հոմանիշների շարքը. Մեծ,— 1. խոշոր, հսկա, հսկայական, աժգահա, ահոնի, ահագին, վիթխարի, (բարբառային)՝ բետ, կոլլո, ջոջ, կոմբ, մեծկակ, մեծղի, տղման: 2. Ականավոր, նշանավոր, ակնառու, աչքի ընկնող (մարգ, գործ): 3. Ընդարձակ, ընդարձակածավալ, լայնածավալ (տարածություն): 4. Բարձր, վեհ, վսեմ (գաղափար): 5. Սաստիկ, ուժգին, գորեղ: 6. Շատ, բազմաթիվ: 7. Գլխավոր: 8. Ավագ, երեց (եղբայր, քույր): 9. Տարիքավոր, մեծահասակ (մարդ): 10. Պաշտոնյա: 11. Գ. (հոգն., մեծեր), նախնիք, մեծունանք (հնգ.) և այլն:

Մեծ բազմիմաստ բառը իր տասնմեկ իմաստներով հոմանշային բարդ կապերի մեջ մտնելով, յուրաքանչյուր կոնկրետ դեպքում տարբեր ձևերով է դրսևորվում մեծ բառի և նրա բոլոր հոմանիշների կապակցականությունը: Այսպես, իր առաջին իմաստով, առաջին շարքում մեծ բառը հանդես գալով ծավալային հատկանիշով, փաստորեն իր մեջ առնում է այդ շարքի բոլոր հոմանիշների ֆունկցիաները առանձին-առանձին, մինչդեռ շարքի յուրաքանչյուր հոմանիշը այդ նույն հատկանիշներով չի օժտված և այլ բառերի հետ

ունեցած կապակցության սահմաններն ու աստիճանները ավելի սահմանափակ են. օր. մեծ տուն՝ մարդ, քար, սար և այլն, բայց խոշոր կենդանի կամ մարդ, ալիկն՝ խոշոր տուն, սար և այլն հնարավոր չէ, կամ՝ հսկա մարդ, բայց չի կարելի հսկա սար՝ քար՝ տուն և այլն. հսկայական դործ՝ աշխատանք, բայց ոչ՝ մարդ, տուն, սար, քար և այլն: Կապակցելիության տեսակետից ընդհանուր արմատ ունեցող բառերն անդամ իրարից տարբերվում են: Անցնենք նույն շարքի հաջորդ հոմանշին. ածղահա բառը կարող է առնչվել միայն մարդ և հասակ ցույց տվող բառերի հետ, ածղահա մարդ կամ հասակ և այլն: Նրա կապակցելիության կարողությունները խիստ սահմանափակ են. ահռելի բառը կապակցվում է, կարծես թե, միայն վիճակային հարաբերություն ցույց տվող բառերի հետ. ինչպես՝ ահռելի դժվարություն և այլն: Ահագին համանիշը առնչվում է ծավալային, քանակային մեծություն ցույց տվող բառերի հետ, ինչպես՝ ահագին քար, փող և այլն: Նույն չափով նաև վիթխարի, մեծղի և մնացած բոլոր համանիշները. օր. վիթխարի հաջողություն, վիթխարի նշանակություն և այլն: Այսպիսով, հոմանիշների շարքի անդամները հանդես են գալիս իրենց իմաստային, ոճական և ֆունկցիոնալ բաղադրանք և իրարից տարբեր զրահորումներով, որով և պայմանավորված է նրանց իմաստային, ոճական և կիրառական հարստությունը:

Հոմանիշների շարքին դուրսնալով, ոմանք ընդունում են նաև հոմանիշների ամպլիտուդան (լայնույթ կամ տատանակետ)⁴: Այս վերջինս հոմանիշների սովորական շարքից տարբերվում է նրանով, որ ամպլիտուդայի անդամները տարբերվում կամ հեռանում են աստիճանաբար, հաճախ՝ միջանկյալ օղակների միջոցով. ալիկնքն՝ հոմանիշները շարքի ղիսաբառից կարող են հեռանալ կամ հոմանիշի շարքի մյուս անդամներից կարող են իմաստային որոշ աստիճանականությամբ տարբերվել. օր. ննջել-քնել-մրավել. կամ՝ ժպտալ-ծիծաղել, քրքջալ, կարկաչել, հոհալ. կամ՝ ուղենալ-ցանկանալ, ըղձալ, փափաղել, տենչալ, պապակել և այլն: Վերոհիշյալ օրինակներում ամպլիտուդան արտահայտված է երևույթների կամ հատկանիշների աստիճանականության (դրահացիա) շնորհիվ:

Շատ դեպքերում, ինչպես նկատել է Վ. Ֆավորինը, ամպլիտուդայի մեջ աստիճանականությունը դարդանալով և հասնելով իր դադաթնակետին, այնուհետև սկսում է շարունակվել ուղիղ գծով. օր. խնդրել, հայցել, թախանձել, աղաչել, աղերսել, պաղատել, աղաչել-պաղատել և այլն: Որոշ դեպքերում էլ, հոմանիշների շարքի անդամների մեջ կարող են առաջանալ որոշակի բաց կամ աղատ տարածություններ, որով աստիճանականության համաչափությունը որոշ չափով խախտվում է. օր. դեր, պարարտ, հաստ, չաղ, ցմփոր, կամ՝ հարուստ-ունևոր, երևելի, մեծահարուստ, մեծատուն, կրեսոս և այլն:

Ամպլիտուդան, սակայն, միայն աստիճանականությամբ չի արտահայտվում, այլև հոմանիշների շարքի մեջ մտնող բառերի իմաստային, ինչպես նաև ժանրային և ոճական այլևայլ տարբերություններով. օր. խիղախ-արի. սպիտակ-ճերմակ. համեմատել-բաղդատել և այլն: Ամպլիտուդայի շնորհիվ հիմնականում արտահայտվում են հոմանշային շարքի հետևյալ առանձնահատկությունները:

⁴ В. К. Фаворин, Синонимы в русском языке, Свердловск, 1953, т. 1, 19—20.

ա) Հոմանիշների շարքում հարևան անդամները իմաստով ավելի մոտ են. օր. բնկեր-բնկերակից, մտերիմ, համախոհ, համամիտ կամ՝ միապետ-միահեծան, վեհապետ, ինքնակալ, թագավոր, արքա, կայսր, շահ, ցար և այլն։

բ) Հոմանիշների շարքում զլխարհոից հեռացած բառերը իրենց իմաստով այնքան են շեղվում նրանից, որքան որ նրանք հեռու են գտնվում. օր. մնացորդ-մնացուկ, ավելցուկ, կոճոն, թերմացք (ուտելիքի), թափուկ, տականք, տակուցք, տակուք, թափոն, թափթփուկ, թափթփանք, փշուրք, փշրանք, փշրտուր, մանրուք. տակումակ (հացահատիկի) և այլն։

Ինչպես ցույց են տալիս բերված օրինակները, հոմանիշների այսպես կոչված ամպլիտուդան, փաստորեն, հոմանիշների շարքի ներքին կառուցվածքի մի բանի առանձնատկությունների դրսևորումն է։

Մինչև այժմ հոմանիշների շարքերը և ընդհանրապես բառերի ու դարձվածաբանական միավորների հոմանշային կապերը քննվում էին հիմնականում ըստ նրանց իմաստային և ոճական առանձնատկությունների։ Պակաս հետաքրքրություն չի ներկայացնում այդ կապերը դիտել բառային և դարձվածաբանական միավորների ձևաբանական և բառակազմական հատկանիշների հիման վրա։ Այդ ուղղությամբ, հատկապես ըստ բառերի ձևաբանական հատկանիշների, ուսմերենի հոմանիշ զույգերի տիպերը առաջին անգամ առանձնացրել է Օ. Ս. Ախմանովան⁵։

Հայոց լեզվի հոմանիշներն ևս իրենց ընդհանրությունների հետ միասին տարբերվում են կառուցվածքային և նյութական որոշակի առանձնատկություններով։ Հայերեն հոմանիշների նման համագրական ուսումնասիրության ժամանակ, բնականաբար, մենք ուշադրություն ենք դարձրել ձևաբանական, բառակազմական և կառուցվածքային հատկանիշներին։ Ըստ այդմ՝ նկատվում են հոմանիշների զույգերի հետևյալ հիմնական տիպեր։

ա) Հոմանիշների շարքեր, որոնք իրենց կազմում լուծեն ոչ մի ընդհանուր արմատական ձևույթներ կամ այդ ձևույթներով կազմված բառեր. այսինքն՝ այդ շարքերը կազմված են տարբեր հիմնական ձևույթներից կամ բառերից. օր. սավառնակ-ինքնաթիռ, պոլ-ձետ, ազի, տտուն, խեղրել-հացել, աղաչել, պաղատել, թախանձել, աղերսել. կամ՝ աշխույժ-զվարթ, կայտառ, առույզ, ժիր, եռանդուն, կենսախինզ, խանգավառ, թովոուն և այլն։ Տարարմատ հոմանշային շարքերի առաջացման նախապայմանը հոմանշային հարաբերությունների իմաստաբանական յափանիշն է, այսինքն՝ ստուգաբանորեն տարբեր արմատներից կամ հիմնական ձևույթներից կազմված բառերի իմաստների մոտությունը կամ նույնությունը։

բ) Հոմանիշների զույգեր կամ շարքեր, որոնց մեջ մտնող բառերը կազմված են մեկ ընդհանուր և մեկ տարբեր (ոչ նման) հիմնական (արմատական) ձևույթներից. օր. միահամուռ-միաձայն. բարեզործ-բարեխնամ. շահախեղիր-շահասեր-շահամոլ. արվեստաբան-արվեստագետ, զազափաբաբան-զազաշահասեր-շահամոլ. արվեստաբան-արվեստագետ, զազափաբաբան-զազաշահասեր-շահամոլ. կամ՝ անտառահավ-մայրահավ, ցախահավ և այլն։ Այս կարգի հոմանշային զույգերում կամ շարքերում հնչյունական կազմով ընդհանուր ձևույթների հետ հոմանշային կապերի մեջ են մտնում նաև հնչյունական կազմով տարբերվող ձևույթները։

⁵ О. С. А х м а н о в а, Очерки по общей и русскон лексикологии, М., 1957, էջ 230—232.

գ) Հոմանիշների ղույզեր կամ շարքեր, որոնք կաղմված են նույն հիմնական (արմատական) ձևույթներից և տարբեր բառակաղմական ձևույթներից (ածանցներից) բաղադրված բառերից, որոնց ածանցների ընդհանուր իմաստները, սակայն, ունեն իմաստային որոշակի առնչություններ. օր. ապօրինի-անօրինական, հակօրինական. նախադուշակել-կանխադուշակել. աղատաբար-ազատապես, ազատորեն. կարմիր-կարմրածեռ, կարմրավետ, կարմրավուն կարմրորակ. դժնդակ-դժնի, դժնյա, քարե-քարյա, քարեղեն. դժվոհ-անդոհ, անհաճո-տհաճ և այլն:

դ) Հոմանիշների ղույզեր կամ շարքեր, որոնց անդամներից մեկը պարզ բառ է, մյուսը՝ նույն ձևույթից կաղմված ածանցավոր բառ. օր. արագ-արագաբար, արագորեն, դանդաղ-դանդաղաբար, դանդաղորեն, տուն-տնակ, դժվար-դժվարին և այլն:

ե) Հոմանիշների ղույզեր կամ շարքեր, որոնք կաղմված են նույն բառակաղմական, երկրորդական ձևույթներից (ածանցներից) և տարբեր, բայց իմաստային առնչություններ ունեցող հիմնական ձևույթներից բաղադրված բառերից. օր. անհոգ-անվույթ, անճիգ, անջանք, անաշխատ. անվարձ-անվճար, անհատույց (ձրի). անփող-անստակ, անդրամ և այլն: Նույնածանց հոմանիշների շարքերը կամ ղույզերը նույնպես կաղմվում են մոտ կամ նույն իմաստ ունեցող զլխավորապես տարարմատ, երբեմն նաև նույնարմատ հիմնական ձևույթների ածանցման հիման վրա: Սրանց հոմանշության գործում հիմնական դերը ոչ թե ածանցների նույնությանն է պատկանում, այլ հիմնական ձևույթների միջև հաստատված հոմանշային-իմաստային կապերին:

զ) Հոմանիշների ղույզեր կամ շարքեր, որոնք կաղմված են հոմանիշ բառակաղմական, երկրորդական ձևույթներից (ածանցներից) և նույնարմատ կամ նույն կամ մոտ իմաստ ունեցող հիմնական ձևույթներից բաղադրված բառերից. օր. անջերմակայուն-անջերմադիմացկուն, անջրաթափանց-անջրանցիկ, անշահ-անշահեկան, անշահավետ, անօգուտ, անօգտավետ. ճշտաբար, ճշտապես, ճշտորեն և շիտակաբար, շիտակապես, շիտակորեն, կամ՝ վերստին-կրկին, ցարդ-ցայժմ և այլն:

Տվյալ դեպքում հոմանշության համար հավասարապես դեր են խաղում և հիմնական և երկրորդական ձևույթների իմաստների ինչպես նույնությունը, այնպես էլ հոմանշությունը:

է) Հոմանիշների ղույզեր կամ շարքեր, որոնց անդամներից մեկը կաղմում է մյուսի բաղադրիչներից մեկը, օր. ճաղ-անվաճաղ, փակոց-արգելափակոց, լար-հաղորդալար, դեմ-ընդդեմ, հակընդդեմ, դեռ-դեռևս և այլն:

ը) Հոմանիշների ղույզեր կամ շարքեր, որոնք կաղմված են կապակցությունների և դրանց համապատասխան բարդությունների կամ հապավումների նույնանիշներից, օր. բնակվարձ-բնակաբանային վարձ, հրամկազմ-հրամանատարական կազմ, հրետագունդ-հրետանային գունդ և այլն:

Ըստ առանձին խոսքի մասերի կամ խոսքի մասային քերականական կարգի պատկանելիության, հայոց լեզվի բառային կաղմում որոշակի հարարերություն գոյություն ունի զրանց հարաբերակցության հետ: Գոյականների, ածականների, բայերի, մակբայների հոմանիշները մոտավորապես համապատասխանում են լեզվի բառային կաղմում այդ խոսքի մասերի հարաբերակցությանը: Հայերենում համեմատաբար սակավ են թվականներով կաղմված շարքերը:

Այսպիսով, իրենց բառա-քերականական առանձնահատկությունների, ինչպես նաև կառուցվածքի տեսակետից բառային հոմանիշների շարքերը հիմնականում բաժանվում են՝ ա) տարարմատ հոմանիշների շարքեր կամ զույգեր, բ) նույնածանց հոմանիշների շարքեր կամ զույգեր, գ) նույնարմատ հոմանիշների շարքեր կամ զույգեր և գ) հոմանիշ ածանցներով կազմվող հոմանիշների շարքեր կամ զույգեր:

Կազմության տեսակետից առանձնակի հետաքրքրություն են ներկայացնում նույնարմատ հոմանիշների շարքերը կամ զույգերը: Դրանք հիմնականում նույն արմատից կազմվող բարդություններն ու ածանցումներն են: Ըստ կազմության դրանք ածանցավոր, բարդ և բարդածանցավոր բառեր են: Հայոց լեզվում այդ կարգի հոմանիշների առատության պատճառը, անտարակույս, հայերենի ածանցման և բառաբարդման հարուստ հնարավորություններն են: Նույնարմատ հոմանիշների զույգերի հիմնական առանձնահատկությունն այն է, որ՝

ա) նույնարմատ բարդություններով կազմված հոմանիշների շարքերի կամ զույգերի ընդհանուր, նույն բաղադրիչից բացի, բարդության տարարմատ մյուս բաղադրիչները նույնպես հոմանշային կամ իմաստային մոտ կապերի մեջ են գտնվում, ինչպես օր. անտառահատ և մայրահատ (անտառ և մայրի), անտառահատ և ծառահատ (անտառ և ծառ). կամ՝ արվեստաբան և արվեստագետ (բան և գետ) և այլն: Այս կարգի հոմանիշ զույգերի ոչ ընդհանուր բառերի կամ ձևերի հարաբերությունները իրար նկատմամբ պարտադիր չէ, որ բոլոր դեպքերում նույնպես հոմանշային լինեն: Հիմնականը, բարդության ընդհանուր, ամբողջական բառային իմաստն է, երբ հոմանշային կապեր են հաստատվում նույն կազմության, ընդհանուր բաղադրիչով կազմված բարդ բառի հետ:

բ) նույնարմատ ածանցյալ բառերով կազմված հոմանիշների շարքերի կամ զույգերի մեջ այդ ընդհանուր արմատների կամ հիմնական ձևերի հետ դրանց մեջ հոմանշային կապերը ստեղծվում են բառակազմական երկրորդական ձևերի՝ ածանցների հոմանշության շնորհիվ, ինչպես՝ անբախտ-դժբախտ, անգոհ-դժգոհ, բնականաբար-բնականապես, բնականորեն և այլն: Նույն հարաբերությունների արդյունք են նաև նույնարմատ բարդ ածանցավոր բառերից կազմվող հոմանիշների շարքերը կամ զույգերը:

գ) իմաստաբանական տեսակետից առանձին հետաքրքրություն են ներկայացնում հոմանիշների այն շարքերը կամ զույգերը, որոնց անգամներից մեկը կազմում է մյուսի բաղադրիչը, ինչպես՝ ճաղ-անվաճաղ, փակոց-արգելափակոց, խաղ-դերախաղ և այլն: Այս զույգերում արդեն, ըստ երևույթին, իմաստային տեսակետից հաստատվել են ընդհանուրի և մասնավորի հարաբերություններ, որտեղ հոմանշային զույգի առաջին բառերը հասկացության ընդհանուր զաղափարն են արտահայտում և միաժամանակ նրանք բազմիմաստ են, իսկ զույգի երկրորդ՝ հոմանիշ համապատասխան բառերը մենիմաստ են և այդ իմաստով էլ ավելի նեղ և կոնկրետ հարաբերության մեջ են գտնվում իրենց համապատասխան հոմանիշ բառի նկատմամբ:

Հոմանիշների շարքերում իրենց արտահայտությունն են գտնում նաև հայերենի բառակազմական այլ առանձնահատկություններ: Այդ տեսակետից առանձնապես հետաքրքրություն են ներկայացնում բառերի բառակազմական տիպերի զուգահեռները, որոնք արտահայտվում են նույնատիպ բառաբարդում-

ների և ածանցումների ձևերով, ինչպես օրինակ՝ դատարկաբան-դատարկախոս, զրաբան, դրախոս, ունայնաբան, ունայնախոս, նանրաբան, նանրախոս և այլն. կամ՝ դետափ-զետեզր. դատարկազի-սնազի (կազմախոսական). կամ՝ թափառաշրջիկ-դատարկաշրջիկ, կրոնափոխ-դավանափոխ, հալատափոխ, կարմրավուն-կարմրաժեռ-կարմրորակ և այլն:

Քննության ենթարկելով հայերենի հոմանիշների շարքերը՝ ըստ նրանց կազմության առանձնահատկությունների, իմաստային ու ոճական, ինչպես նաև ձևաբանական և բառակազմական հատկանիշների, հուսով ենք, որ հետագա ուսումնասիրողները առաջ կբաշեն նորանոր խնդիրներ և ավելի հստակություն կմտցնեն արծարծված հարցերի մեջ:

СИНОНИМИЧЕСКИЙ РЯД В СОВРЕМЕННОМ АРМЯНСКОМ ЯЗЫКЕ

А. М. СУКИАСЯН

Р е з ю м е

В данной статье рассматриваются теоретические вопросы синонимического ряда и некоторые его особенности в армянском языке. По количественному признаку они делятся на двучленные и многочленные.

По своей структуре синонимы составляют простые и сложные ряды, которые образуются из: а) собственно литературных синонимов; б) слов-синонимов восточноармянского и западноармянского литературных языков; в) литературных и заимствованных слов-синонимов; г) литературных и диалектных синонимов.

Исследуются синонимические ряды, образовавшиеся из абсолютных и идеографических синонимов. Одновременно, синонимические связи слов и фразеологических единиц рассматриваются, в основном, с точки зрения их семантических и стилистических особенностей, а также по морфологическим и словособразовательным признакам.